

Tesalonika Vegenalitini Luhuva Nampa 1 Pauló Gizo Kimimó

Tesalonika vegená nónohá kimike gizo kimi gakó

1 ^{1 a} Neza Paulona itó Sailasiko Timotigegi makó nounike Tesalonika numutoka Ómasímini vegenala zuha Ómasi ameteho itó Guivahanite Izesu Kilistoni vegenala zuha lekeza nene luhuva netá imane gizo nolukumuve. Nasahilí itó hulu lekelitoka mino moloko minino.

Tesalonika vegenalite Ómasimú gili alévolé ake monó gapoló vamó

²Leza gamena gamena lekelikumú Ómasi agepoka lova lova oaká nune. Itó numuna nolunike lekelikumuki geleko loaká nune. ³Lekeza Ómasimú gili alévolé iaká nenémini gihila ali utó iaká niave, itó vegená nasahilí ikitake likigika kimiaká niave. Guivahanite Izesu Kilistokumú alévolé iki lakagata losi gelemiki ageva iaká niave. Nenemú gelenounike ameteho Ómasímini avogisaló agepoka loaká nune. ⁴Ligivetegita, Ómasímo agika lekemeake lekelémo etó imó nenémini gihila nene ⁵Izesuni gakó lamaná aleko voko lo lekemekuko, ha gakó loló imó negopa, amuzavagi nego, Sikalahulímo nene gihiláa neve loko lo likimimóma neve loko gelenouné. Lekelitoka minunike lekelikumule loko oko moloko unike monó hoza alunimó nene mota gilinave. ^{6 b} Lá okuko, oko moloko unitó nene lekeza iki miliki iake, Guivahani oko moloko itoki nene iki miliki niave. Lá ake nene, monokumule liki gopoguni nimililitago, Ómasímini Sikalahulímo lekelémo vatí igo, gakó lamanáma gili alikago, mulutikú agila guluma lamaná imó neve. ⁷Lá iake, lekeza goí iki monó gapoló nivago Masetonia mikasiuka itó Akaia mikasiuka monó gili alévolé a vegená lekeza atímini iki iki miliki amó. ⁸Lekelitokatí nene Guivahanímini gakó lamaná puu loko vike Masetonia

^a 1:1 Apo 17:1 ^b 1:6 Apo 17:5-9

mikasiukagi Akaia mikasiukagi vimó. Lá imóza, nenegó nomive. Lekeza nene Ómasimú gili alévolé amó nenémini gakó nene numutó namató vokago, nenemú lezate lo kimitunimoláa makó nomive. ⁹Holutikú hozaváa alekuko nenémini gihiláa utó i gakola nene kezáini li limiaká niave. Lekeza nene soza ómai netá lekemegeša amiake Ómasi alévolé ve gihilaloka gímiziki gelekelé imiake, ¹⁰gipala heneneikutí alémo oti ve Izesú minomo iteko okulumakutí limitikumú ageva iki niave liki li limikago gelenoune. Áisi nene gamena napaló mesaha olimioko nogosani limitikutí nene lugutó vizeaká ve noive.

Pauló Tesalonika numutoka monó hoza alimó

2 ¹Nigivénegita, lekelitoka vunike hoza alunimó nene ha amimole liki lekezatini gilinave. ²^c Ganá nene Pilipi numutoka gopoguni mililitake alivi letivi ilitamó nene lekeza mota gilinave. Lá ikamóza, Ómasímo lukesate hize lé olimikago lova vetini holúikú lelegesá legemigo minunike Ómasímini gakó lamaná lo utó oko lo lukumuháma neve. ³Lakagata aleko lo lekemeaká nounimó nene gele gopa napa oko, soza ligikagi nouhakutí utó osá amive, itó lokogoka vizeko lo lekemesá amune. ⁴Ómasímo ániгоletago, etokago, Izesuni gakó lamaná geleko ale gúekinake lo kimitune loko lelémo etó okago, ámina gakó nolune. Vegenalite giliko lamaná itive loko nomive. Ómasi eza ligikagú ániгоaká vémo gelekiko lamaná itive loko lo lekemeaká noune. ⁵Lekelisi nene lelí mogona gilinave. Leza lekelitoka minunike, asugunatoka moni henonimú voká linogo lekegepoka loaká gakó itó lukugupe aleko iteaká gakó ma lo lekememune. Ómasímo gelekago noluve. ⁶Lekelisihe itó numutó namató vetehe lelikumú giliko itekiko lugulizaki ve loló itune loko lamune. ⁷Leza Kilistoni aposolola nouninazo, nenemú netá matá makokumú voká lokoko lemelinamó nene lamaná ilinamóza, lá oko nomive. Izóike keza izegipáini kilími kava ziaká niave. Áminagó oko leza nene lekelitoka minunike lekelémo kava zeaká unimó. ⁸Nenémini lagaváa nene ligika lekelitoka minokago Ómasímini gakó lamaná lo likimitune lokogó lamune. Ligika lemeni lekelitoka lekeme gikitatune loko ligika lekelitoka nego luháma neve.

⁹Nenemú ligivetegita, moni henonimú nagá zeko ale minuko goselé lekepelekative loko únaká neteká lugupémimi hoza amuza moloko itó vauva aleko minunike, Ómasímini gakó lamaná lo lekemehá mota gilinave. ¹⁰Leza ligika hanato minago hee hee loko lihimate nomigo minunike, monó gele vegená lekelitoka oko moloko unimó lekezagi itó Ómasímogi mogonate mota gilinave. ¹¹Lá iake, ve makolímo izegipa palaloka oko moloko oaká noimó nene leza lekelitoka áminámini

^c 2:2 Apo 16:19-24, 17:1-9

oleketunike, etó etó oko gakó lo lekeme asú unimó. ¹²Lá unike, lakagata aleko lekelémo kii loleketunike Ómasímini avogisalo itiiki aí lapaná ali lá itave loko sele lo lekemeaká noi ve Ómasímo gelekiko lekeza iki miliki iko etative loko lo lekemeaká uháma neve liki lekeza mota gilinave.

¹³Leza nene Ómasímini gakó lo lekemekuko, vejenalitini gakó loló amimó. Lekeza nene Ómasímini gakole liki giliake ali gúinamóma neve. Itó lamaná lá oko neve. Ómasímini gakó nenémo monó gili alévolé ina vejená lekelitoka hoza aleaká noive. Nenémú lélisi nene Ómasi agepoka lokogó nominune. ¹⁴^d Ligivetegita, Ómasímini vejenala zuha Zutaia mikasigú Izesu Kilistotoka viki gímize vejenaki lekezagi hamolímuni iki iki miliki niago gasovagi netá lílí ilikitamó. Keí nene Zuta vete gopogu galatakatalá ikitamómámuni iki likigivetike lugáate gopoguni mililikitamó. ¹⁵^e Zuta ve keza Guivahani Izesuni itó Ómasímini agepagutí gakó liaká a ve ámina iki kipili helemó, itó leza lipiliki limiselemóma neve. Keikumú Ómasímo giligo lamaná amigo, numutó namató vejenalitini lova ve lílí iaká niave. ¹⁶Lá niake, hetoka vejená monó lo kemekuko, lamaná ikatave liki gapo hize lí itupe liki lovaga li limiaká amó. Keza lá iva iva ikago, keí lihima nene amupiló amupiló oko iteko minokago, Ómasímo izapaló molokago, nenémuni lovváa mota keitoka anitekave.

Pauló Tesalonika numutoka goha vitove loko gilimó

¹⁷Ligivetegita, gamena koma ahulo hotó oleketunimó nene ligikatunú nomive. Lugupetunú lá unimó. Lekezagi minamunike, lekelí ángiatupe loko amuza moloko minoaká une. ¹⁸Nene voko ángiatune loko lokunimóza, neza Paulona gamena gamena ángiatove loko nougo, Satá nene lelí gapo hize lí goha olimikave. ¹⁹Lekelikú lagaváa geleká nounimó nene lá oko neve: ²⁰Guivahanite Izesú anititi zupa nene hí vejenakumú mulutegú agila guluma noiko minatune. Hí vejenakumú lagata gopa gesá amune. Lekelisigó nene lelí hozámuni gihila lílí inamó neve. Itó lamaná lekelikumú agepoka loaká nounimó, itó mulutegú lamaná geleká nounimó nenazo, nenémú lekelikumú logoliza vizeko minanogo une.

3 ^{1f} Lekelikumú miluma geleká nouke, minoko aleko umó netamigo, nezagó Atena numutoka mininake, ²Timotini amiselekugo, ahulonimioko lekelitoka vitive loko lo hukumó. Eza nene ligivetehe noike Ómasímini hozaló ve minake, Kilistoni gakó lamaná loaká noi vémo monokú lekelémo vávani itive loko, itó ale kii loleketative loko, ³itó lekelisi nene gopoguni mililikimikiko monó ahulikatave loko nene amiselekuve. Gopoguni mililimiaká niamó nenémo Ómasímo litó utó

^d 2:14 Apo 17:5 ^e 2:15 Apo 9:23,29; 13:45,50; 14:5,19 ^f 3:1 Apo 17:15

oaká noive liki lekeza mota gilinave. ⁴Leza nene lekelitoka minunike goí oko lova nene lumupiló itinogo ive loko lo lekemenouháma neve. Ámina gakó nene alévolé okave liki mota gilinave. ⁵Lá okago, ámina gasovagi netakumú nene gimilegú moloaká vémo gimilikú molahe, itó monó ahulahe, itó ali minahe, itó lelí hozámini gihiláa haha okahe, monó alinamó nenémini mogonáa gilitove loko lekelikumú miluma napa gelekuke minoko aleko umó netamigo, Timotini amiselekugo vimóma neve.

⁶Itó Timotí nene lekelitokatí atiginá oko ake, gakó avetó oake lekeza gili alévolé amó itó likigika kimiake nasahilí ikimiaká niamó itó lekeza nene nenikumú lagaváa giliaká niamó itó neza lekelí ángatove loko geleká noumómámini iki neni ángatune liki giliaká niamó nenémini gakola lo leme asú okave. ⁷Nenemú nigivénegita, gopogu galatakalatá nenémini agikagú itó miluma geleká nenémini agikagú nouke, lekeza Izesukumú gili alévolé iaká niamó nenémini gakó gelekuke mulúnegú geha zekave. ⁸Itína lekeza nene Guivahaniloka viki gímiziiki alévolé initakumú gelekinake, ligikagú lamaná okiko, minoko aleko inogo une. ⁹Itína Ómasímini avogisalo lekelikumú mulutegú agila guluma noimómave loko lekelikumú Ómasi agepoka loaká noune. ¹⁰Guivahanímo gele lemekiko, lekelitoka vinake, eza ángigiko eza ángigiko inake, monó lugáa minoloko vonoimó nene miní ameko lo likimitune loko únaká neteká vauva aleko Ómasiloka loaká noune.

¹¹Ameteho Ómasi ezáa itó Guivahanite Izesú gapo velelimikiko lekelitoka vituninazo. ¹²Itó lekelitoka vokuko nene, Guivahanímo hoza alekiko, eza agika amiko eza agika amiko ita netalímo hutilí ino, itó ligika lekelitoka mulunimó áminámini iki likigika mukí vegeatoka milatamó nenémo puu loko hutilí oko napa ino. ¹³Lá okiko, Guivahanímo likigika nene ale kii lolikimikiko, Guivahanite Izesú eza vegejala zuha mukí kelémoko ati zupa nene lekeza nene Ómasi ametehini avogisalo vihelé lo miniko etó keké viziki lihimatini nomiko minatave.

Oko moloko nouko Ómasímo giliko lamaná iti gakó

4 ¹Nigivénegita, Guivahanite Izesuni agulizató lakagata aleko gakó makó lo likimitoze, gililo. Monokú miniki aliki itamó nenémo Ómasímo giliko lamaná itimó nenémini mogonáa lo lekemekuko giliake monokú minoakalímini iki mota niamó nene ámina iki amuza miliki minalo. ²Guivahanite Izesuni gakotó gakó lo lukumuhá nene mota gilinave. ³Ómasímo gili agika nene lá oko neve: Mokoló netá ahuliiki likigika nene gizopa lo miniko minataze. ⁴Itó etó etó iki likigika lamanatotikó hee hee liki vená alitaze.

§ 3:6 Apo 18:5

⁵Moko netakumú lukugupegú ló guluma iko nomive. Numuká vejená keza Ómasímini mogona gili hee hee lamatite lá iaká niave.

⁶Ámina netá alita ve nene Guivahanímo áminámini meinaváa kimitive loko goí oko lakagata aseva aleko lo lekemenouháma nenazo, ve makolímo ámina suni alekoko agivelahini nene lihimavagi netá loló otamino. ⁷Likigika golotuvagi minatave loko nomive. Likigika vové avetiko minatave loko sele lo likimimó neve.

⁸Nenemú makó keza gakó imane gili ahulatamó nenete vejená ániagi ahulatagopa, Ómasi eza Sikalahú lekemeaká noi vema ániagi ahulanigave.

⁹Lekeza Izesuni vejenala zuha lugáa nene likigika kimitave loko nanamú luhuva netá lekemeva lekemeva itune. Ómasi ezáa likigikatunú eza amiko eza amiko itave loko lo likimike lekelepizeneimóma neve. ¹⁰Itó lekeza lamaná Masetonia mikasigú numutó numutó Izesuni vejenala zuha minimi vinamó nene likigika kimiaká niave. Lá iaká niamóza, goha napa iki nenémini itave loko lakagata aleko lo nolukumune. ¹¹Itó lo lukumunimó nenéminiki gakó vivi vovoga lamiki, numutikú legesó iki miniki, lekezatini netakumukó gili miniki, lekezatini likigizanitunú hoza alitakumú nene amuza milalo. ¹²Lá ikiko nene numuká vejenalite lekelikumú gili lamaná itave, itó ve makokumú gelegele minamiki minatave.

Guivahani atiginá iti gakó

¹³Nigivénegita, lekeza nene hele vejenakumú nene monó gelematite okulumakú monolímuni helisa henoni alitune liki gizapa isá amamó nenéminiki miluma napa giliki ive nama ikatave loko lo likimitoze, gililo. ¹⁴Leza Izesú heleake goha oti gakó nene gele alévolé onoune. Ámináminoko Ómasi eza Izesuni alémo atiginá iti zupahé nene, Izesukumú gili alévolé iake hele vejenaki ezagi kelémoko anogo ive. ¹⁵^h Guivahanímini gakola makó lo likiminogo uve. Mikasiuka logómulagi nouko Guivahani anititimó nene, leza nene hele vejená kivilegeminogo une. ¹⁶Guivahani ezáa okulumakutí limitove loko gamoga geko sele lolimioko ageló vejenalitini agulizaki venini anó lupa itó Ómasímini pikuli anó nomiliko liminogo ive. Lemekiko, Kilistokumú gili alévolé inake helemó keza goí iki otinigave. ¹⁷Otikiko, logómulagi ha minunimoláa nene Ómasímo lelémo otopá zekiko, keitoka límusi amupiló noitinake Guivahanigi hotu lanogo une. Guivahanigi mininake mino lúaló moloko minanogo une. ¹⁸Nenemú lekeza gakó imane ligili hagili iki eza alémo alévolé otiko eza alémo alévolé otiko iki minalo.

^h 4:15 1 Koli 15:51-52

Guivahani atikumú gizapa oko minatune

5 ¹⁻² Ligivetegita, guminaló ve keza holugú litá iki anitiaká niave. Áminagó oko nene Guivahanímini gamena nene galinali alitanogo ive liki mota gilinamó nenazo, nenemú Guivahanímini gamenavamú nanamú luhuva gizoko lo lekemeva lo lekemeva itune. ³ Nene gamenaló vejená keza mota hulu okave liiki legesó iki niiko, golivagi netá litá oko aniteko kumupiló itekiko golesa inigave. Izegipa agatupagi vená makolímo litá oko galinali miluma geleko ininá oaká noimó nenémini oko vejenatoka anitekiko, nana iki golisi itamó neve.

⁴ Lá onoimóza, ligivetegita, lekelisi nene límugusigú minamave. Nenemú Guivahanímini gamena nene guminaló ve nenémini oko litá oko galinali anititimó nene lekeza gatizá niiki ininá itató niamave. ⁵ Lekeza lapanalímini itó livilímini mututoni niave. Límugusímini mututoni minamune. ⁶ Nenemú ve lugáa nenete kovó akiaká niamó nenémini iki akamilo. Matutini gopa amiko lekezatini gizapa alévolé iki minalo. ⁷ Kovó akiaká nia vejená keza límugusigú kovó akiaká niave. Itó nagamí niaká vejená keza límugusigú nikake kigika gopa oaká noive. ⁸ Lá onoimóza, lapanalímini mututoni loló unimó nene ligika gopa amiko gizapa oko minatune. Lá inake Ómasímú gele alévolé itunimó itó ligika eza amiko eza amiko itunimó nenémo lagele loló itive. Ómasímo lugutó vizitikumú lagata losi gelemoko ageva oaká nouhá netá nenémo lelí geha akilí loló itive. ⁹ Nenémini mogonáa lá oko neve: Ómasímo mesaha olimikoko nogosani limitove loko lelémo etó amimóma neve. Eza Guivahanite Izesu Kilistoni lugutó vizeaká netá ali lá itave loko lelémo etó onoimóma neve. ¹⁰ Guivahanímo lelikumule loko hilimó nene leza helekinakehe itó logómulagi noinakehe ati gamenaló ezagi minatune loko lá imóma neve. ¹¹ Lekeza nenemú itína aliaká niamó nenémini ikigó eza hize lé otiko eza hize lé otiko iki itó eza luhusava aliko eza luhusava aliko iki aliliki viki minalo.

Kagata alike gekéini leketamó

¹² Ligivetegita, netá makokumú amuza moloko nololeketuve. Lekelitoka monó hoza aliki lakagata aseva aliaká nia ve keza Guivahanimule liki ali goí nilikitake likilími hee liaká nia vemú giliko lamaná ino. ¹³ Lá iki kilími napa iki likigika kimiiki hozanimimú gilikiko itino. Itó lekeza nene hulu iki minalo.

¹⁴ Ligivetegita, lakagata aleko gala vizeko láa loko lo nolukumuve: Hoza alisá ama vejená nene kagata alilo. Itó kovoza helepelé iaká nia vejená kilími mómoká iki kilími kii likitalo. Kigika alévolé ami vejená hizi lé

¹ 5:2 Mat 24:43; Luk 12:39; 2 Pit 3:10 ³ 5:8 Isa 59:17; Epe 6:13-17

ikitalo. Lá iiki vejená mukikumú legesó iki hulu iki minalo. ¹⁵Golesa netakumú pekimiiki eza apiliko eza apiliko ali volaló imaló amilo. Lá okatune liki lekezatitokagi vejená mukitoka netá lamaná oketatune likigó amuza miliki minalo.

¹⁶Mulutikú agila guluma ikogó minalo.

¹⁷Ómasiloka gamena gamena numuna liki minalo. ¹⁸Netá matá mukikumú Ómasi agepoka lilo. Nene Izesu Kilistoni mututoni lilí inamómave loko Ómasímini agikalokagó neve.

¹⁹Ómasímini Sikalahulímini loláa zi lihamilo.

²⁰Ómasímini agepagutí gakó lo lekemeakakumú giliko lememino. ²¹Li likimita gakó mukí nene giliiki gona miliki minalo. Lamaná nehe golesa nehe liki giliiki lamaná neko nene ali minalo. ²²Netá golesa haitopaitolímini nene lekemegeza amilo.

²³Ómasi eza nene hulu amelaho ezáa likigika nagamí zeko lekelémo guluví lo asú okiko likigika lekemeni avasavagi niminiko Guivahanite Izesu Kilistó anititi gamenaló lihimavatini nomitimó minataze. ²⁴Sele lo lekemeaká noi ve eza lo hukokago alévolé oaká noi vémo ámina hoza aleloko voko ale asú inogo ive.

²⁵Ligivetegita, lelikumú Ómasiloka liki minalo. ²⁶Izesuni vejenala zuha mukí nene monokú eza aputá viziko eza aputá viziko iki minalo.

²⁷Neza Guivahanímini avogisaló luhuva netá imane Izesuni vejenala zuha mukí gati kimikiko gili asú itave loko nololeketuve.

²⁸Guivahanite Izesu Kilistoni nasahilí lekelitoka minoloko voko minino.